



O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

SETEMA 2019

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws



FALE IUPELI I MALUA



FAASINO UPU

1.	FAASINO UPU	2		
2.	LAUGA	2	-	4
3.	PEPA MAFUTAGA FAAFOUINA 2019	5	-	12
4.	FETU'UTU'UNAIMUNIAO	13		
5.	ITULAU MO TUPULAGA	14	-	15
7.	O LE TAUA O LOTU I AIGA E FAAMASANI AI FANAU	16		

O LE LAUGA

Tusi Faitau:

F/Tuai: Kenese 1:1-10; 20-22

F/Fou: Ioane 2:1-11

Matua: Kenese 1:2a& 6

“Sa soona nunumi le lalolagi ma ua gaogao, sa ufitia foi le moana i le pouliuli;... Ua fetalai mai foi le Atua, Ia i le va o vai le vanimonimo, e vaa'i isi vai ma isi vai.”

Autu: O vai o le foafoaga

[The water of creation]

Faatomuaga

E le toe tau fesiligia le taua o le vai poo le suavai i o tatou olaga. E taua e le gata mo le soifua o le tagata, ae faapea foi le ola o meaola ma laau o le siosiomaga. E feinu ai tagata, feinu ai manu, e feinu ai foi laau. O lona uiga, e taua le vai i le foafoaga o le lalolagi ma mea o iai. O le nuu o Aikupito, e faaigoa o le ato falaoa (bread basket) i lea itu o le lalolagi. Aua e tele meaai e maua ai. Ao meaai ia, e ala ona ola lelei ona o le vai

mai le vaitafe o le Naila, o loo tafe i lona ogatotonugalemu. Lea foi tatou te molimauina i le tatou ola nei. Aumi se taimi e le timu ai, ua mago le vao, le ola lelei mea toto, ae feoa'i solo tagata e saili se vai e feinu ai.

Ae a toe to manatu foi i faalavelave faalenatura na po'ia ai lo tatou atunuu i tausaga ua mavae, ona lagona lava foi lea o le popole ma le atuatuvaale. O le Tsunami o le 2009, o le vai poo le sami na maliliu ai le silia ma le toa 100 tagata i le itu i sauté, ma sauté isisifo o Upolu. O lologa foi na lofia ai si o tatou atunuu i timuga mamafa i nai tausaga ua mavae, na iai foi tagata maliliu, faatasi ai ma le faaleagaina o le tele o meatotino. Manatua vave ai lava le tala i le lolo. Ina ua agasala le lalolagi, na tatala ai e le Atua pupuni o le lagi ae liligi ifo le vai, ma feoti uma ai tagata o le lalolagi tuai sa iai, sei vagana Noa ma lona āiga. O lona uiga foi la, e mafai foi e le vai ona aumai le puapuaga ma

le oti. Ioe, e faaola le vai, e fasioti foi le vai.

Feagaiga Tuai:

A o uiga ia e 2 o le vai o loo maua i le tatou faitauga i lenei taeao, mai le mataupu 1 o le tusi a Kenese. Le tala o le foafoaina e le Atua o le lagi ma le lalolagi. Fai mai a o lei faia lava se isi mea, sa na o vai lava sa iai. O le mea muamua lea e eseese ai le tala lea, mai le isi tala o le foafoaga o loo i le mataupu e 2. O le mataupu e 2, e amata e na o le eleele matutu lava, e leai se vai. A o le mataupu 1 na tatou faitauina, e amata na o vai, vai lava. O lona uiga, e iai le taua o le vai i le tusi tala o le mataupu 1.

E faaosofia ai foi se fesili, poo ai na tusia ia tala o loo i le tusi o Kenese? Mai lava i le tatou laiti, na a'oa'oina ai i tatou, o le toeaina o Mose na tusia ulua'i tusi e 5 o le Tusi Pa'ia. Peita'i i su'esu'ega o le Tusi Pa'ia ua iai nei, ua fesiligia ai lea tulaga. Ma o le tasi lenei o mau ua fesiligia ai. Auā afai o Mose e toatasi na tusia le tusi o Kenese, aisea ua 2 ai tala o le foafoaga? Ae le gata i le 2, ae aisea ua matua eseese ai lava le tala o loo i le mataupu 1, ma le

O LE LAUGA

tala o loo i le mataupu 2? Poo le mea ea, na tusi le tala muamua, toe sui lea o le mafafau o le toeaina, ona toe tusi ai lea o le isi tala e ese mai le tala muamua?

O le manatu ua talia lautele e le au su'esu'e o le Feagaiga Tuai, o le tala lenei o loo i le mataupu 1, na tusia e le au ositaulaga o le nuu o le Atua, poo Priests. O le faamoemoe, ia atagia ai le Atua e pule toatasi i mea uma. O lo latou Atua, malosi ma silisili ese, na faia mea uma o le foafoaga. E le tataua lava la i se Isaraelu ona toe alu ese mai le latou Atua lea. O le a taatia le isi vaega o le finauga, pe se tala na nono mai se isi mea le tala lea. Ae o le a taula'i le vaai a le lauga i le mafafauga faa-ositaulaga na mafua ai ona tusia le tala lea. A tatou mafafau i le galuega faa-ositaulaga, ona maua ai lea o se fesoota'iga ma le vai. Aua o le vai, o le faailoga o le faamamaina o le nuu o le Atua, i le galuega faa-ositaulaga. Atonu o se mafuaaga faapea, o loo amata ai le tala lenei i le mataupu 1, amata lava i le vai.

Ae le o se vaaiga manaia o loo aumaia e le tusitala, i foliga o le vai i le amataga o le tala. Aua fai mai le vaega muamua o le tatou matua, "Sa soona nunumi le lalolagi ma ua gaogao, sa ufitia foi le moana i le pouliuli." Ioe, sa iai le vai i le amataga, ae sa ufitia i le pouliuli. O le upu ua faaliliuina i le pouliuli, e le na o se nofoaga pogisa. Ae o loo aumai ai ma uiga o se nofoaga o le agasala, e maua ai le faanoanoa, e maua ai le tagitu'i, e nofo ai le tiapolo. E leai se ola ae na o le oti e maua ai. O

foliga matautia ia o le vai, o loo taumafai le tusitala e faa-atamaimo le au faitau.

Ona amata loa lea o le galuega foafoa a le Atua. Amata i le malamalama. Faaigoa le malamalama o le ao, ae faaigoa le pouliuli o le po. Fai mai le talitonuga, talu ai ona o le Atua o le Atua o le malamalama, o le ala lea o le fai muamua o le malamalama. Sei faamalamalama muamua mea uma, ma iloa ai le mea e tataua ona fai. Ae ao lava ina manatua, e ui ina faia o le malamalama, ae sa iai pea le pogisa poo le pouliuli.

Uma loa le faiga o le malamalama ma ua iloa atu mea uma, faasaga ane loa le Atua i le vai. Le vai foliga taufaafefe lea o loo iai, lea ua fetalai iai le Atua i le vaega lona lua o le tatou matua: "Ia i le va o vai le vanimonimo, e vaa'i isi vai ma isi vai." A faaoga lo tatou malamalama faaonapo nei, ona mafai lea ona tatou faapea, o vai i lalo, o loo faatatau i le sami ma vaitafe. A o vai i luga, o le aua e maua mai vai o loo i lalo, lea e maua ai ao o loo i le lagi. Ona tatou faafesoota'ia lea i le faataamilosaga o le vai: e miti'ia e le la ona liuaua lea ma alu i luga. Ona timu lea ma toe pau mai i lalo; ma faataamilo ai faapena.

Ae peitai, e talitonu le lauga e le faapena le ata o loo i le mafafau o le tusitala. Ona o le upu Eperu ua faaliliuina i le vanimonimo, e le na o se aua, a o se meafaitino, e malo, ma o se mea e mafai ona faalauteleina (an extended solid

surface). O le mea lea na tuu e le Atua i totonu o le vai, ona sii a'e lea i luga e vavae a'i le vai. Ua ave ai isi vai i luga, ae tuu isi vai i lalo. Ma o le talitonuga lena o le au Eperu sa iai i le lalolagi; o le lagi i luga e faaofuofu, ona o le mea lea na vavae a'i e le Atua vai i le amataga. A o le talitonuga foi o tagata Eperu, O le vaega lea i luga, o le afioaga lea o le Atua (the abode of God), e i luga atu o le faaofuofu lea.

O lona uiga, o le talitonuga o le tusitala, e iai vai o loo i luga. O loo atagia lea talitonuga i le upu Eperu ua faaliliuina i le "lagi" - *shamayim*. Aua o le upu lea, o loo iai i totonu le upu Eperu mo le "vai" - *mayim*.

Ona faaauau lea o le tala o le foafoaga, e pei ona tatou faitauina mai le 20 – 22, ua faamatala na o vai o loo i lalo. Fai mai ua fai tanimo ma i'a tetele ma meaola uma i le sami. O tanimo, o manutetele ia fai mai isi, e pei o ni tarako. Ai o manu ia o dinasors i aso la. Ua faia foi manufelegei, e felegei saoloto i le vanimonimo.

Mulimuli ane fai isi mea ma faia ai ma le tagata. O fea na ola ai mea ia o le foafoaga? Na ola i le avanoa o vai i luga ma vai i lalo. A toe faaupu i se isi faaupuga, na mafai ona ola mea o le foafoaga, ina ua vavae e le Atua le vai i le amataga, ma suia ai le vai leaga, e avea ma vailelei. Vai sa ufiti ai le pouliuli. Sa soona nunumi ma gaogao. Sa tumu i faigata ma puapuaga. O se nofoaga e le maua ai se ola. E leai se isi e fia nofo ai. A o lea na fai mai, na vavae e le Atua, ina ia maua se vai lelei mo lana foafoaga. Na suia e le Atua le vai leaga, e avea ma vai aoga mo mea o lana foafoaga.

O LE LAUGA

Feagaiga Fou:

Le mana silisili ese lea o le Atua na te faia ai suiga mo le lelei, lea foi o loo atagia i le tala sa tatou faitauina mai le F/Fou. Le ulua'i vavega poo le ulua'i faailoga na faia e Iesu e tusa ai ma faamaumauga a le fai-Evagelia o Ioane.

Fai mai o le 'aiga o le faaipoipoga sa auai Iesu ma lona āiga ma ona soo. Manatu nisi o le faaipoipoga a se tasi o le āiga o Maria le tinā o Iesu. Ma o le ala lea o le pisi o Maria e saili se fofo, ina ua logo mai ua mae'a le uaina. I le tu a Iutaia, o se mea faalumaluma mo se āiga e faia se faalavelave, ae le lava le uaina mo tagata. Lea la na tapa ai ia Iesu.

Faatonu e Iesu auauna e faatutumu vai maa, poo kalone maa e ono sai le fale. O le faamoemoe o kalone nei e tuu ai le suavai, mo le aganuu a Iutaia mo le faamamaina. A taunuu malo i le fale, e fufuluvae. A o lei faia le taumafataga, e fafano lima. O nei gaioiga uma, e moomia ai le vai. E oo mai la i le taimi lea o le tala, ua toatele tagata ua i totonu o le fale, o le ala lena o le leai o se vai i kalone maa nei.

A o totonu o kalone maa nei, na faia ai e Iesu le vavega poo le faailoga, na liliu ai le vai e fai ma uaina. Pau lava upu o le faatonuga a Iesu, o le "faatutumu", "asu" ma "ave". Fai mai le pule o le tausamaaga ina ua ia inu i le uaina fou lea, "se ua muamua mai le uaina leaga, a o lea ua mulimuli mai le uaina lelei." Ua suia e Iesu le vai e avea ma uaina, a ua suia ai foi ma le tulaga ta'uvalea na se

manu e oo i le āiga, sui i le ta'uleleia, ma le olioli.

Faatatau:

Lo tatou nuu e i lenei taeao, ua toe faamanatu mai e le Tusi Pa'ia mo i tatou, ua na o le Atua lava e mafai ona ia faia suiga lelei mo lo tatou ola. Na ia suia vai o le pouliuli ma le pogisa sa iai i le amataga, ina ia aoga mo lana galuega foafoa. O le Atua lava lea e tasi na liutino tagata ma na ia suia le vai e avea ma uaina lelei. O le Atua o suiga. Ae na te le faia ni suiga e leaga ai le tagata, a e na te faia suiga mo le manuia ma le ta'uleleia.

Ua tofia i tatou e galulue i tiute ma tofiga eseese. E eseese foi taleni ma agavaa ua tuuina iai tatou, ina ia mafai ai ona tatou faatino o tatou tofiga. Ae tasi le faamoemoe na faia ai i tatou e le Atua: o tatou o tausimea o le foafoaga a le Atua. Ia ola le foafoaga a le Atua ona o i tatou. O lona uiga, ia avea i tatou ma vai aoga mo le foafoaga a le Atua. Ia aoga lo tatou ola, e ola ai mea o le foafoaga. O a ia mea? Tagata, ma mea uma na foafoa e le Atua.

E iai le upu e masani ai Malua, a ulufale loa le tagata i Malua, tuu uma ona mamalu i fafo o le pa pa'epa'e. Ae faagaogao le tagata, e faatumu e le Atua. E iai a isi e fiu e utu atu i se vai fou, a o la e tumu i isi vai. O le fe'au mo i tatou, ia vavae eseina vai tuai na. Ia suia o tatou tagata ina ia lē toe avea ma vai tuai, a ia avea ma vai fou ma uaina fou, e lelei i le tofo, ma ola ai le foafoaga a le Atua.

Sui e ai? Na o le Atua e mafai ona faia lena suiga. Afai na sui e le Atua vai i le amataga, ma sui le vai i le uaina, e le faigata i le Atua ona suia i ta'ua e avea ma uaina lelei, ma vai lelei mo lana foafoaga. Ae moomia le tatala o ta loto e afio ai le Atua, na te suia o tatou mafaufau, sui o tatou uiga, sui o tatou tagata, mo le Atua ma lona finagalo Pa'ia.

Tatou te lē toe tumau ai i uiga o le faalogologotigā ma le faavaivai, ae suia i le loto tele ma le finau mo mea lelei. Ia lē toe vaavaai masei ma faasinolino lima, a ia suia i le loto fesoasoani ma le loto faamagalalo. Auā o le taimi lava e suia ai i tatou e le Atua, ua avea ai foi i tatou ma uaina fou, e suamalie ma lelei i le taumafa. E avea ai foi i tatou ma vai aogā mo le foafoaga a le Atua.

Kerugma:

O le afio mai o Iesu i le lalolagi, o Ia lava o le Vai Ola, e ola ai o tatou agaga. O lona faamoemoe ina ia ave'esea le tagata mai le pogisa o le agasala, ae toe foi i le Atua. O ana fetalaiga ma ana mea na fai a o soifua i lenei lalolagi, o le faataitaiga sili lea e tatau ona tatou sui agai iai. Na i'u lava ina maluu i le satauro mataga ina ia suia i tatou mai le agasala, ina ia avea ma tagata ua faamalalamalaina. O lona toe tu mamalu mai le maluu ma le oti, ua faaolaina ai i tatou, pe a tatou talia o Ia i le faatuatua ma le salamo faamaoni. Tumau i le Atua le viiga, nei e oo i le faavavau, Amene.

Saunia:

Melepone Isara

FFA



PEPA MAFUTAGA FAAFOUINA

FAIFEAU 2019

PEPA MAFUTAGA FAAFOUINA FAIFEAU 2019

MALO O LE ATUA

Faatomuaga:

Ou te muai faatulou atu lava i le paia maualuga o le saofaiga i Tamā o le Ekalesia, le paia i le Auaifagaluega tofofi a le Atua ua aofaga potopoto i le malu nei. Tulou! I le ava tele ma le faaaloalo e tata ai, ou te faatalofa atu ai i le suafa mamalu o Iesu Keriso le Ao o le Ekalesia, i lau afioga i le Ta'ita'i Mafutaga ma le paia o le mafutaga i leni taeo. Talofa lava. O le a taumafai atu se vaivaiga o le auauna i se tasi o mataupu ogatotonu i a'oa'oga faa-kerisiano, aemaise ai o le molimau a le Tusi Paia e le gata o le Feagagia Tuai a e faapea foi i le Feagaiga Fou. Ua matauina pea le Tele o se eseese o faauigaga o le Malo o le Atua ona o le ala o loo molimauina ai e le Tusi Paia, aemaise lava i a'oa'oga ale Alii Faaola ao soifua ma faia lana galuega tala'i. O le faamoemoe o leni taumafai, ina ia iai se taotoga manino e mulimulita'i i ai le a'oa'oina ma le laugaina o leni lava mataupu, mo le nofo silafia e le mamalu lautele o le Ekalesia i nai o tatou tagata lotu.

O nisi o fesili taua e ta'ita'iina ai mafauauga a o faatalanoaina leni mataupu e faapea: O le a ea le uiga tonu o le malo o le Atua? Ua iinei ea le malo o le Atua poo taoto mai i le lumana'i? E tutusa ea le malo o le Atua ma le malo o le Lagi? O ai ea e tata ona ulu atu i le malo o le Atua? Atoa ma isi lava mau fesili o loo tuufesili ai pea le toatele o tagata lotu.

O le a faatulagaina le talanoaga i ni vaega se fa: (1) O le a sa'iliili ai le uiga moni o le faaupuga "O le Malo o le Atua", e amata mai i le Feagaiga Tuai, o tusitusiga faa-Iutaia, atoa ma le Feagaiga Fou. (2) O le a sailiili ai i talitonuga faa-Iutaia e tusa ma lona talafaasolopito i luma atu o perofeta e oo mai i le toe foi o le tafeaga ma aoaoga fa-Rapi (Rabbinic teachings) o le Lotu Iutaia. (3) O le a suesueina aoaoga a le Alii e uiga i le Malo o le Atua, e le gata o le talitonuga ua lata mai le Malo o le Atua, a o le talitonuga foi o lea ua iai le Malo o le Atua i le lalolagi i le taimi nei, atoa ai foi ma le vaaiga i le faaliga o le tumu atoatoa o le Malo o le Atua i le lumanai. O le a talanoaina ai ma nisi lava vaaiga i le Malo o le Atua ma ona uiga loloto ua faaaliga i le Satauro o Keriso, aemaise o le nuu poo tagata o le Malo o le Atua, atoa ma le olaga tata ma le Malo o le Atua. (4) o le a ootoo atu ai aoaoga e uiga i le Malo o le Atua i isi vaega o le Feagaiga Fou e aofia ai le tusi o Galuega, o tusi a le Aposetolo o Paulo, o tusitusiga a Ioane atoa ma isi tusi e pei o Eperu, Iakopo ma le 2 Peteru.

1. O le Malo o le Atua ma lona Uiga:

O le a taumafai i le vaega leni o le talanoaga e sailiili i le Tusi Paia ma isi tusitusiga e uiga i le mataupu o le Malo o le Atua ma nisi a'oa'oga e fesoota'i faatasi, ma agai ai i se atoaga o lona uiga.

(a) I le Feagaiga Tuai: E le o taua i le Feagaiga Tuai le faaupuga "*O le Malo o le Atua*," a e o loo taua le faaupuga. "*O le Malo o le Alii*" (*Malkuth Yahweh*) i le tusi 1 Nofoaiga a Tupu 28:5. Peita'i o le upu 'malo'

(kingdom) o loo faaaogaina i nisi o taimi faatatau i le Atua. Faata'ita'iga. "*Lou malo*" o loo taua i le Salamo 45:6; 145:11, 13; faapea foi "*lona malo*" o loo taua i le Salamo 103:19; 145:12. O lo o taua foi i le 1 Nofoaiga a Tupu 17:14 le faaupuga "*o lou malo*" o loo sau mai le fofoga o le "Alii o 'au". I le tusi a le perofeta o Opetaiā 21 ma le Salamo 22:28, o loo faaupuina "o le malo" o loo faamatalaina e a "le Alii"; i le fuaitau: E ou le malo, le Alii e," o loo taua i le 1 Nofoaiga a Tupu 29: 11; i le vaega o le tusi o Tanielu 4:3, 34; 7:27 o loo taua i le 1 Nofoaiga a Tupu 29:11; o loo taua ai le "Atua o le lagi" o loo faatuina le "malo". O nei mau eseese e faatatau i le 'malo' e pei ona taua i luga, a faasino i le Atua, ua faapea ona manino lo latou uiga faavae, ua faatatauina i le pule-faatupu', 'mamalu-faatupu', ma le 'nofoa'iga-faatupu.'

(e) I Tusitusiga a Iutaia mulimuli ane: I tusitusiga faa-apokalifa, o loo vaaia ai foi le faauuga "malo o le Atua" (Poto o Solomona 10:10), ma faapea foi ona aliali mai ai i isi tusiga faa-apokalifa mau i "lona/lou malo". O loo molimauina foi lea tulaga i tusitusiga ua ta'ua o Pseudepigrapha (tusitusiga e ese mai le tusi paia ma le Apokalifa ae faitauina lava faa-le-Tusi Paia). I tusitusiga mulimuli ane e pei o le Targum (o le faaliliuga faa-Aramaika o ni vaega o le Feagaiga Tuai) o loo molimauina ai le faaogaina soo o le faaupuga o le "malo o le Atua" aemaise lava le "malo o le Lagi". I le Targum, e tutusa lava le uiga o le "malo o le Atua" ma le "malo o le Lagi". O le mafuaaga ona o le faaaogaina e tagata Iutaia o le "Lagi" e sui ai le

PEPA MAFUTAGA FAAFOUINA

FAIFEAU 2019

suafa o le Atua. I nei tusitusiga uma o loo faamamafaina ai lava le uiga o le “malo o le Atua/Lagi” o le “pule faa-tupu” poo le “nofoa’iga faa-Tupu” a le Atua.

(i) I le Feagaiga fou: O loo molimauina i Evagelia a Mataio, Mareko ma Luka (Synoptic Gospels) le faaaogaina soo o nei faaupuga o le “malo o le lagi” ona o le malosi o lona sootaga faa-Iutaia, ua faaaogaina ai le “Lagi” e sui Sinopi isi faaupuga e pei o “lou malo” (Mat. 6:10; Lk. 11:2); “lona malo” (Mat. 6:33, I. 12:31); “o le malo” (Mat. 4:23; 8:12; 9:35; 13:19; 38; 24:14; 25:34; Lk. 12:32) “o le malo o le tama” (Mat. 13:34); “malo o lo’u Tama” (Mat. 26:29). I nei mau uma ua taua i luga, o loo faatatauina le “malo” i le “Atalii” o le tagata” (Mat. 13:41; 16:28), poo “Iesu” lava ia (Mat. 20:21; Lk. 1:33; 22:29-30; 23:42).

I le Evagelia a Ioane o loo taua faalua ai le “malo o le Atua” (Ioane 3:3, 5), ma le faaupuga “o lo’u malo” ma le fofoga o Iesu lava ia e pei ona ta’ua i le Ioane 18:36. E faaaogaina faaono le “malo o le Atua” i le tusi o Galuega (1:3; 8:12; 14:22; 19:8; 28:23, 31), a e faalua le faaupuga “o le malo” (1:6; 20:25). I tusitusiga a Paulo o loo taua ai le “malo o le Atua” i le Rom. 14:17; 1 Kor. 4:20; 6:9 – 10; 15:50; Kal. 5:21; Kol. 4:11; 2 Tesa. 1:5. O loo taua i le 1 Kor. 15:24 le tuuina atu e Keriso ma le Atua”. O loo taua foi i le 1 Tesa. 2:12 “i lona malo ma lona mamalu”, faapea foi ona taua i le Kol. 1:13 “o le malo o lona lava Alo pele”. I ana tusi faa-faifeau (Pastoral Letters – 1 & 2 Timoteo ma Tito), o loo taua faalua ai “lona malo” e faatatau ia Iesu Keriso (2 Tim. 4:1. 18). I le tusi i le ‘au Eperu, o loo taua i le 1:8 “lou malo” e faatatau i le “Atalii”, ma “le malo” o loo taua

i le 12:28. I tusi ua taua o Tusi Faa-Katoliko (Catholic or General Epistles – 1&2 Peteru, 1&2&3 Ioane, Iakopo ma Iuta) o loo taua ai “le malo faavavau o loo tatou Alii ma le Faaola o Iesu Keriso.” Atoa ai ma le toe tusi, Faaaliga o loo ta’ua ai i le 1:9 faamaumauga e uiga i “le puapuaga, ma le malo, atoa ma le onosa’i”, “O le malo o le lalolagi ua avea mo loo tatou Alii ma lona Keriso” (11:15), ma “le malo o loo tatou Atua” (12:10).

I mau uma o loo taua i luga mai le Feagaiga Fou e uiga i le “malo”, o loo faaaogaina ai le upu Eleni o le Basileia. O le uiga faavae o lea upu o loo faamatalaina ai le “malo” o le “nofoaiga-faatupu” poo le “pule-faatupu” a le Atua.

2. Talitonuga faa-Iutaia:

E ui ina le taatele le faaaogaina o le “malo” e faatatau i le Atua i totonu o le Feagaiga Tuai, peita’i o loo taatele foi le faaaogaina o le talitonuga o le Atua o le Tupu, o se manatu o loo fai ma faavae o le a’oa’oga e uiga i le “malo o le Atua.”

(a) O taimi i luma atu o Perofeta: O taimi tau amata o le talafaasolopito o le Tapuaiga faa-Iutaia, na talitonu ai Iutaia i le Pule-faatupu a le Atua i lona nuu o Isaraelu, e faapei foi ona faia e isi nuu ma o latou Atua, o se tulaga e faapei o pulega faa-tupu faa-le-tagata. O lona uiga, o le pule-faatupu a ia atua e gata lava i tuaoi o nuu atoa ma tagata o loo tapuaia ia i latou. Na faapea ona talitonu ai tagata Iutaia, a tuua e se tagata eleele o Isaraelu, ua faapea foi ona tuua le pule-faatupu a le Atua ma faigata ai ona toe tapuai ia te Ia (2 Tupu 5:17-18; 1 Samuelu 26:19; Salamo 137:4). I lea talitonuga, na faapea ona faatapulaaina ai le aafiaga o atua i le ola o tagata.

Foliga ua na o vaega lava e moomia ai nei atua ona faatoa tapa lea, e pei o taua ana fili o lamatia le nuu, ma nisi lava mataupu e faigata ona fai e tagata se iuga. O le isi foi itu faigata o tapulaa o le aafiaga o atua i o latou nuu, o le tulaga i le taua o tagata ma eleele ia te ia e pei foi o ia i tagata, ona o le tulaga o se atua e leai ni tagata ma ni eleele e pule ai o se mea e matua faigata ona tupu. O lona uiga e iai tapulaga i le ala e pulea ai ese atua ona tagata, auā na te le mafai ona faaumatia ona tagata pe tuuina atu i latou i se isi malosi ese sei vagana ua le toe avea i latou mona tagata. I nei ala uma, o le pule-faatupu a le Atua ia Isaraelu sa talitonuina e iai ona tapulaa. Peita’i i totonu o ia tapulaa uma, sa i ai le atoatoa o le pule a le Atua ia Isaraelu: “Aua nei faia ni atua ese i ou luma” (Esoto 20:3).

(e) O le aafiaga o perofetaga a Perofeta: A fai na taliaina le pule-faatupu a le Atua ia Isaraelu e faapei o le ala na pulea ai isi nuu e o latou atua, e ese lava la le talitonuga na atia’e e Isaraelu e uiga i lea tulaga, na mafua ai ona ese ai lava o ia mai isi nuu. O le mafuaaga o lea tulaga, ona o le galuega a perofeta o le seneturi e valu (8) TLM ma faagasolo mai ai, na faapea ona tafua ese ai tapulaa e pei ona ta’ua i luga i le pule-faatupu a le Atua. Na suia atoa e le tala’iga a perofeta le vaaiga i le natura ma uiga faaalua o le Atua, ae le gata i lea, ua faapea ona molimauina ai le pule-faatupu a le Atua ua aofia ai mea uma - tagata ma nuu uma o le lalolagi. O le taofiga e faapea o le natura o le Atua o le paia atoatoa, o le amiotonu ma le alofa, ua faigata ai ona faatapulaaina lava pule-faatupu na o se vaega o tagata ua

PEPA MAFUTAGA FAAFOUINA

FAIFEAU 2019

mana'omia lana fesoasoani. Ma o le afio mai o le Atua ina ia avea o Ia ma leoleo o le amiotonu ma le alofa i le va tagata o le tasi i le isi, atoa ma le faamasinoga tonu i mea sese uma ma le ola saisaitia o tagata, ua mapuna a'e ai le manatu o mea uma e tutupu i le olaga faale-tagata, atoa ma le va-tagata, ua tataua ona 'au mai i lalo o le pulega ma le ta'ita'iga a le atua.

O le talitonuga o perofeta, e pule aoao le Atua e le gata o Isaraelu, ae aofia ai nuu uma o le lalolagi. O le mafuaaga lea o le talitonuga o Amosa (1&2) e faapea, o nuu uma o le lalolagi e tutu i luma o le faamasinoga tonu a le Atua. I le Amosa 9:7 o loo faamanino ai e le Atua ia Isaraelu e tutusa lava i ona luma i latou ma Aitiope, Filisitia ma Suria.

O le tafeaga i Papelonia na vaai i ai perofeta o se faasalaga o Iuta o a latou agasalala i luma o le Atua. O lea talitonuga na atili faalauteleina ai ma faamalosi atili ai le talitonuga i le pule ma le nofoaiga-faatupu a le Atua. I le vaega o Isaia ua taua o le 'Isaia lona lua' (40-55), o loo laualuga ai le manatu e mafai e le Atua ona faaaogaina nuu malolosi o le lalolagi i fafo atu o Isaraelu e faataunuaina ai ana fuafuaga. O le agai ane la o Peresia e pulea le lalolagi i ia taimi, na talitonuina o le finagalo lava o le Atua, ma faapea foi ona taua Kuresa o le 'leoleo mamoe' ma le ua 'faauina' e le Atua (Isa. 41:1-7; 44:24-45:25). O isi atua uma ua ta'ufaatauvaaina ma faaleaogaina i luma o le Atua (Isa. 45:5 – "O a'u o le Alii, a e leai lava se tasi; e leai se atua, na o a'u lava").

O le faaleaogaina o atua uma e aofia ai e le gata o atua o ituaiga ae faapea foi atua o malo, atoa ma atua o le aoao o le natura o mea

(Job 38-41; hosea 2:8). O le tuputupu ae la o leni talitonuga i le Atua e to'atasi, ua matua aveeseina ai tapulaa uma e faatatau i le pule-faatupu a le Atua, ma ua le faamutaina na o Isaraelu ma ona pulega-faatupu, a ua avea ma pulega i mea uma e aofia ai le amio ma le aoao o mea uma. I totonu o lea taofiga, ua vaaia ai le Atua o le tupu faavavau i nuu uma ma mea uma; o "lou malo o le malo lea e faavavau lava" e "pule aoao foi lona malo" (Sal. 145:13; 103:19).

(i) O taimi ua toe foi le tafeaga: O le talitonuga i le malo faavavau ma le pule faavavau a le Atua o Isaraelu i nuu uma ma mea uma e pei ona tupu a'e mai a'oa'oga a perofeta, ua feagai nei ma faafitauli. Ua manino le taliaina lautele o le pule tutasi a le Atua i nuu uma o le lalolagi, atoa foi ma totonu o Isaraelu lava ia. Ma o le taumafaiga ina ia foia lea faafitauli na fausia mai ai le mataupu i "Suesuega i mea e tutupu i aso gataaga" poo "mea e tutupu i le lumana'i" (eschatology). O le moni ma faamaoni o le talitonuga i le Atua o le tupu e faavavau ma lona malo e faavavau, ua lagonaina ai se manatu, o le atoatoa o le pule-faatupu a le Atua ua le mafai ona faaaliala ma molimauina i le olaga o le taimi nei. O le mafuaaga lea o le tupu ae o le talitonuga i le pule-faatupu a le Atua o se faamoemoe lelei i le lumana'i.

O le amataga o talitonuga faalutaia i le mataupu i aso gataaga o loo maua lava i tusitusiga a le 'au perofeta. E ui o perofeta lava ia ma lo latou valaauina o le folafola atu o le finagalo o le Alii i o latou lava aso/taimi, e aoa'i tagata i le tataua ona ola e tusa ma le amiotonu a le Atua, atoa foi ma le ogaoga o aafiaga o le o ese mai ala o le Alii,

a e na vaai foi perofeta i le lumanai i le oo mai o le 'Aso o le Alii'. Pe a afio mai ma le manumalo le Atua e faavae lana pule ma lana nofoaiga-faatupu i le atoatoa e tataua ai. Peita'i e matua ese mamao le manatu lautele e faapea, o le aso lea e faaolaina ai e le Atua Isaraelu mai ona fili ma faatuina lona malo e faavavau; a o nuu uma o le lalolagi (Amosa 5:18-20; Sakaria 1:14-18). I le mavae ai o le 'Aso o le Alii', ua manatu perofeta e oo mai ai aso o le ola faafouina, o aso faa-'auro ona o faamanuiaga, o le filemu ma le nofo-lelei i le lalolagi atoa i lalo o le pule-faatupu a le Atua (Isa. 2:2-4; 11:6-9); Mika 4"1-4). O le naunautaiga lea i le oo mai o aso i le lumanai na faapea ona atia'eina aga'i i a'oa'oga faa-apokalupisa i tusitusiga a Ioelu; Isa. 24-27; Sakaria 9-14, seia oo ina faaatoatoaina i le tusi o Tanielu ma tusitusiga uma faa-apokalifa o le seneturi e 2 TLM ma le seneturi 1 TA.

Na amata mai talitonuga faa-apokalupisa ina ua taumafai e faafesootai le faatuatuaga i le pule-faatupu a le Atua o mea lelei ma le matagofie, ma le olaga o mea tigā ma le matagā i le lalolagi. O le taumafaiga e fofo leni faafitauli na tupu mai ai le talitonuga maumaututu i malosiaga e lua o loo ola faatasi, e ala lea i le malo faaleagaga o le tiapolo ua ta'ita'ina e Satani, o loo vatau ma le malo poo le pule-faatupu a le Atua. O le malosia o le malo o le tiapolo ua vaaia o loo aga'i ina faamalosi atili, peita'i ua talitonuina o loo mafua ona malosia ona o loo faatagaina e le Atua, ma e i ai lava le taimi e faaumatiaina ai. Ma o ia tiga ma mafatiaga uma ua tutupu faalausosoo i le vaai a le 'au faatuatua ua faapea ona vaaia faa-

PEPA MAFUTAGA FAAFOUINA

FAIFEAU 2019

apokalupisa ua na o ni faailoga o le lata mai o le gataaga.

O le taimi ma le natura o le faaaliga atoatoa o le malo male pule-faatupu a le Atua, o loo faapea ona aveese uma ai manatu o tusitusiga faa-apokalifa. O isi o loo taga'i i se malo faa-auro e molimauina i le lalolagi, ao isi o loo taga'i tasi lava i le fatuina o le malo faavavau i le lagi. O nisi taimi ua taua ai le malo e faatuina i le afio mai o le Atua lava ia e aunoa ma se mesia. A o nisi taimi ua vaia ai le oo mai o le malo ua faafesoota'i ma le afio mai o se Mesia. O se tasi o tulaga sili ona taua ua fai ma faavae o le talitonuga o le Feagaiga Fou i le 'malo o le Atua', o le faaaliga e pei ona ta'ua i le Tanielu 7, lea o loo faaaliga ai le aveeseina o le pule mai malo o le lalolagi faasolo mai i le taimi o le tafeaga, ma tuuina atu i le 'au paia a Le Silisili ese, e fai foi mo i latou le malo e faavavau, e faavavau lava" (7:18, 22, 25, 27), ua faaaliga mai e ala i "Le e pei o le Atalii o le tagata ...ua foaiina atu ia te ia le pule, ma le viiga, ma le malo, ina ia auuana ia te ia o nuu uma, ma atunuu, ma gagana eseese; o lana pule o le pule e faavavau lea, e le mavae atu ia, o lona malo foi e le faaumatia" (7:13-14).

I lalo ifo o nei foliga eseese o le malo poo le pule-faatupu a le Atua i tusitusiga faa-apokalifa, a o loo ta'oto loloto ai pea le talitonuga lautele e faapea, e toe itiiti lava ona faalogoina lea o aafiaga o le pule-faatupu a le Atua i le lalolagi atoa. O le faamoemoe laualuga lea o le 'au faatuatua uma o Isaraelu i le seneturi 2 TLM. O loo aliali pea lenei faamoemoe i le tatalo o le Kaddish (tatalo o faamafanafanaga i taimi o tiga ma faanoanoaga), o le tatalo a le 'au Iutaia lotonuu i le seneturi 1 TA,

ma o loo faapea lava ona faia e oo mai i le aso nei. I lea tatalo o loo faaiuina faapea: "Ia faatuina e ia lona malo i taimi uma o lou ola atoa ma ou aso, faapea foi le ola atoa o le aiga o Isaraelu." O loo faapea foi ona aliali i Evagelia lea faatuatua o i latou "o loo sa'ili i le malo o le Atua" (Mareko 15:43; Luka 23:31; cf. Luka 2:25, 38; 17:20; 19:11).

O i latou na taliaina lea talitonuga i le faamoemoe i aso gataaga po o le lumana'i, na faapea ona lauga i ai Ioane le Papatiso i le 28-29 TA. Ua faapea ona manino i le mau a Mataio upu mai le fofoga o Ioane: "Inā salamo ia outou, auā ua latalata mai le malo o le lagi" (3:2). O ia upu a Ioane ua faapea foi ona sau mai le fofoga o le Alii o Iesu i le Mat. 4:17 cf. Mareko 1:15). Peitai o le mamafa o le fe'au faa-perofeta a Ioane o le faalauiloaina o le latalata mai o le aso o le Alii, ma le tatalo i tagata ina ia salamo e tapena ai mo lea aso, ma ia fai ma faailoga o le salamo le papatisoina. O le vaega fou i le talaiga a Ioane i aso gataaga, o le talitonuga o le oo mai o le Mesia e le mo le laveaiga o Isaraelu, a o le faamasinoga mo Isaraelu ma nuu uma o le lalolagi (Mat. 2:12; Lk. 3:17). O lona uiga a le salamo e le faasoina; e le toe faalagolago se Iutaia i lona sau mai le gafa o Aperaamo (Mat. 1:5). O lona uiga, e amata ane le galuega tala'i a le Alii, ua leva ona i mafaufau o tagata le oo mai o le taimi e faaatoatoaina ai le malo ma le pule-faatupu a le Atua.

(o) O a'oa'oga a le 'au Rapi: E moni lava sa faapea ona talitonu foi Rapi (tagata faaalologia ma maualuluga i le sosaiete, na ave i faiaoga i le vaitaimi o le Alii) i a'oa'oga e uiga i le mataupu o aso gataaga, a e sa i ai lava le itu na naunau tele i ai e uiga i le pule-

faatupu a le Atua. Na faapea ona latou manatu o le pule-faatupu a le Atua o se aoaiga faa-le-Atua e ao ona taliaina e tagata ta'ito'atasi i le usita'i faamaoni ma faia le finagalo o le Atua. I nei tusiga a le 'au Rapi, o le malo o le Atua/lagi ua ta'ua i isi taimi e faapea ona "mauaina" e se tagata lava ia mo ia. Ma ua faapea ona taua ai le mauaina e Isaraelu o le malo o le Atua i le mauga o Sinai. O i latou foi o nuu ese ua talia le tulafono ma tu faa-Iutaia ua faapea ona latou "mauaina mo ia le malo o le lagi". Mo Iutaia, o le tautauina o le tulafono (Shema-Teuteronomie 6:4-5) i aso uma ua talitonuina o le faaauuina lava lea i taimi uma o le "mauaina mo le tagata lava ia o le amo o le malo o le Atua". I lea talitonuga, ua iloa ai o le "malo o le Atua/lagi" ua taliaina o se tulaga o loo tupu lava i le taimi nei i taimi uma e taliaina ai le pule-faatupu a le Atua i le usitai atoatoa i le tulafono ma faia le finagalo o le Atua.

3. O A'oa'oga a Iesu Keriso:

Ua faailoa manino mai e le 'au faievagelia "o le malo o le Atua" o le mataupu ogatotonu o le talaiga a Iesu i taimi o lana galuega i Kalilaia (Mat. 4:23; 9:35; Lk. 8:1; 9:11; cf. Lk 4:43-44). O le su'esu'ega o tusi a le 'au Sinopi ua iloa ai le faaogatonuina o le manatu i le malo i mafaufauga ma a'oa'oga a Iesu Keriso. O le faaupuga "malo o le Atua" poo isi faaupuga e feso'ota'i, ua lagonaina pea mai fofoga o le Alii i evagelia taitasi a le 'au Sinopi. O loo taua faa-sefulu ma le tolu i le mareko, sefulu ma le tolu i le Q (saunoaga a le Alii), lua sefulu ma le lima i le M (patino ia Mataio), ma le ono i le L (patino ia Luka). E oo foi i mau faasino i galuega tala'i a le 'au soo ua iloa ia o le

PEPA MAFUTAGA FAAFOUINA

FAIFEAU 2019

fe'au na latou o e tala'i e faatatau lava i le "malo o le Atua" (Mat. 10:7; Lk. 9:2; 10:9, 11). O le manatu foi i le masani o le faalogo a tagata i le a'oa'oina i le "malo o le Atua" i le taimi o Iesu, o loo manino i le faamatalaga o le aafiaga o tusitusiga a le apokalifa faapea ma le 'au Rapi e pei ona ta'ua i luga. Ua faapea foi ona silafia lava e le Alii ala eseese ua talitonuina e mafai ona maua ai e le tagata le "malo o le Atua": o le talitonuga o le Atua o le tupu o le faavavau (vaega 2 (e) o i luga); o le talitonuga o le pule-faatupu a le Atua e mafai ona avea ma mea moni i le taimi nei i le ola o le tagata e ofoina atoatoa le ola i le usita'i e faia le finagalo o le Atua (vaega 2 (o) o i luga); atoa ma le talitonuga i le "malo" o le taunuuga o le fa'amoemoe mo le lumana'i i aso gataaga (vaega 2 (i) o i luga). O nei talitonuga taitasi o lo o aliali i a'oa'oga ale alii, peitai o le talitonuga o loo faamamafaina o le faamoemoe i le lumanai i aso gataaga.

O le faafitauli faigata o le tau faamalamalamaina o a'oa'oga a Iesu e uiga i le lumanai ma aso gataaga na afua mai i ni itu se lua e faapea, e ui o le taumafaiga e autilo i le "malo o le Atua" o le a'oa'o mai i se taimi latalata mai i le lumanai, a o loo i ai foi saunoaga a le Alii o loo faaalina manino ai le "malo o le Atua" ua faapea ona faalia i le tagata o Iesu Keriso ma lana galuega tala'i. Ua tele se taumafaiga ina ia faafealofani nei itu e lua o le a'oa'oga i le "malo o le Atua" i se tulaga maoti se tasi e a'oa'oina ai: poo le autilo i le faamoemoe o taoto pea i le lumana'i (futuristic), poo le talitonuga i le faamoemoe o i le lumanai ua faataunuina (realized). O taumafaiga uma i lea tulaga ua

manino ai le faigata tele ona o le oo ai ina faaiuiga sese le tele o saunoaga a le alii. Ma ua faapea ona talia lautele se talitonuga e ta'oto pea i le tulaga o iai e tusa ma a'oa'oga a le alii, a e taumafai e malamalama le fesootaiga o le tasi i le isi, ina ia iloa tonu ai le finagalo o le alii e tusa ma le "malo o le Atua/lagi".

(a) O le latalata mai o le malo: E tusa ai ma le tala a Mareko 1:14-15, na amataina le galuega tala'i a le Alii i Kalilaia i lana saunoaga: "Ua oo mai ona po, ua latalata mai le malo o le Atua; ina salamo ia, ma faatuatua i le talalelei." E ui ina i ai finauga i le upu "latalata mai" ma le upu "ua oo mai" e tau faamatalaina ai le uiga o le fetalaiga a le alii, peitai ua faapea ona faatumauiina pea le faaaogaina o le latalata mai" e faamatalaina ai. Ua o gatasi foi ma le feau a le Alii i ona soo ina ua auina atu i latou e tala'i: "A outou o. Ia outou tala'i atu, ia faapea atu, Ua latalata mai le malo o le lagi" (Mat. 10:7; Lk. 10:9, 11). O lona uiga, na amataina le galuega ale alii i le folafola atu o le "malo o le Atua" ua latalata mai, ma ua faapea ona auina ona soo e tala'i le folafolaga lava e tasi.

O lea foi le faamamafa i le "malo o le Atua" o se mea e tupu i le lumanai e pei ona vaaia i le saunoaga taua a le alii, "E moni, ou te fai atu ia te outou, o loo tutu mai nisi iinei, e le oo ia te i latou le oti, seia latou vaaia le malo o le Atua ona oo mai ma le mana" (Mareko 9:1). O lenei perofetaga ale Alii ua manatu nisi na faataunuina i le gasologa o mea tutupu i le talafaasolopito e pei: Liuaina o le tino o Keriso, o le toetu o le Alii, o le faatafunaina o le malumalu i Ierusalem, atoa ma le salalau atu o le Lotu Kerisiano i itu uma o le malo o Roma. Peita'i

ua mafuli atu manatu ona faamatalaina e faapea, o loo fetalai le alii e faatatau i le faaatoatoaina o le malo o le Atua i le lumana'i. O loo faaalina lea tulaga i le ala o loo suia ai e Mataio le saunoaga a le Alii e faapea: "E moni ou te fai atu ia te outou, o loo tutu mai iinei nisi e le oo ia te i latou le oti, se'ia latou vaaia le Atalii o le tagata ua sau i lona malo" (Mat. 16:28). Ua o gatasi lea tulaga ma le isi mau a mareko e faapea: "Ona iloa atu lea e i latou o le Atalii o le tagata ua sau i ao ma le mana tele ma le mamalu" (Mareko 13:26). O lona uiga o le oo mai o le malo o le Atua ma le mana e pei ona fetalai ai le Alii i le Mareko 9:1, e ao ona faamatalaina faatasi ma le 'toe afio mai' o le Atalii o le tagata i lona mamalu i le lumana'i.

O loo faaalina foi lea faamamafa a le Alii i le lumanai o le malo o le Atua i lana fetalaiga i le talisuuga mulimuli ma ona soo: "E moni ou te fai atu ia te outou, ou te le toe inu lava i le fua o le vine, se'ia oo i lea lava aso oute inu ai le uaina fou i le malo o le Atua" (Mareko 14:25 cf. 22: 18). E foliga o loo i le mafaufau o le Alii le faaatoatoaina o le malo o le Atua, i le 'aiga tele a le Mesia e pei ona faaataina i le talisuuga ma ona soo. E faapea foi se manatu i le mau a Luka i le talisuuga mulimuli a Iesu ma ona soo na fetalai ai le Alii: "E faapei ona tofia mai e lo'u Tama o le malo ia te a'u, e faapea foi ona ou tofia outou, ina ia outou aai ma inu i la'u la'o'ai i lo'u malo.." (Lk. 22:29-30). O ia fetalaiga a le Alii i le talisuuga faai'u ma ona soo o loo faaalina ai le ogatotonu i le finagalo o le Alii o le faaatoatoaina o le malo o le Atua a o aga'i atu o ia i lona maliu i le satauro, ma faapea ai se lagona ai lava o le finagalo o le Alii e avea lona maliu

PEPA MAFUTAGA FAAFOUINA

FAIFEAU 2019

ma ala e aga'i atu ai i le faaatoatoaina o le malo i le lumana'i.

O le isi vaega o faata'oto o loo faamamafaina ai 'auala o le tuputupu a'e (growth). E fa ia faata'oto e fesoota'i lelei ma le malo o le Atua: (i) Mk. 4:26-29 – o saito na totoina ma tupu fua faalilolilo i le eleele; (ii) Mat. 13:24-30 – o le saito ma le titania; (iii) Mat. 13:31-32; Mk. 4:30-32; Lk 13:18-19 – o le fatu sinapi; (iv) Mat. 13:33; Lk 13:20-21 – o le mea faafefete. E mafai lava ona tupu se lagona o nei faataoto o loo faatatau i le isi o le malo o le Atua i le taimi nei, peita'i ane o loo faamatalaina nei faataoto ma le vaai agai i le lumanai i le faaatoatoaina – o le tupu ae o le saito ma taunuu i lona seleselega, o le tutupu faatasi o le saito male titania ma faatali se ia seleseleina ona tuu eseeseina ai lea, o le totoina o le fatu sinapi ma tuputupu a'e ma avea ma laau tele, atoa ai ma le faafefeteina atoatoa o le falaoa. O lona uiga, o loo laualuga i le faamoemoe o le alii le faaatoatoaina o le malo ile lumana'i.

Ua faapea foi ona manino i le tatalo na a'oa'oina e le alii i ona soo le faamoemoe mo soo ma e 'au faatuatua uma, ina ia tatalo pea mo le oo mai o le malo o le Atua ma faia lona finagalo i le lalolagi e pei ona faia i le lagi (Mat, 6:10; Lk. 11:2).

(e) O le Malo o le Atua i le taimi nei: O le faamatalaina o le malo o le Atua ua i ai i le taimi nei ua faaalina manino i fetalaiga a le Alii o loo ia faamatalaina ai le uiga loloto o ana galuega mamana. O se tasi o fetalaiga taua a le Alii o loo taua i le Luka 11:20 ma le mataio 12:28: "A e afai o le aao o le Atua ou te tulia ai temoni, ua oo

mai lava ia te outou le malo o le Atua". O lea fetalaiga a le Alii ua iloa i le fesagai ai o le Alii ma le malosi faa-temoni ma faaalina ai le faatoilaloina o temoni, o se faailoga o le oo mai o le malo o le Atua. O loo ta'ua uma e Mataio, Mareko ma Luka le fetalaiga "E mafai faapefea se tasi ona ulu atu i le fale o le tagata malosi, ma vetea ana mea? Se'ia mua'i fusifusia le tagata malosi, i le vete ai lona fale" (Mat. 12:29; Mk. 3:27; Lk 11:21-22). I lenei fetalaiga ua manino ai o le tagata malosi o loo faasino ia Satani, ma o le talitonuga faa-Iutaia e oo mai le iuga ona saisaitia lea o Satani. A o le vetea o le fale o Satani ua faalia ai le faatinoina e Iesu o le amataga o lea faamoemoe sa manatu o loo ta'oto i le lumana'i.

E faapea foi le faamatalaina o le uiga loloto o le tali a le Alii i le fesili a Ioane le Papatiso: "Ina o atu ia ouluea, ma faailoa atu ia Ioane o mea ua ouluea vaai i ai, ma faalogo i ai; ua pupula tauaso, ua savavali pipili, ua faamamaina lepela, ua logo tutuli, ua faatutuina e na oti, ua folafolaina le talalelei i e matitiva" (Lk. 7:22; cf. Mat. 11:4-5). E ui ina le o taua le faaupuga "malo o le Atua" i le tali ale Alii, peitai ua faatatauina e Iesu ana vavega ma galuega tetele ua faia i se gagana o loo lagonaina ai valoaga faaperofeta e uiga i aso o le afio mai o le Mesia (cf. Isa 29:18-19; 35:5-6; 61:1). O loo i ai foi le tele o fetalaiga a le Alii e ui ina le o faatatauina i le malo, peitai o loo molimauina ai le faamoemoe o aso gataaga mo Isaraelu ua faapea ona faataunuuna i upu ma galuega a Iesu Keriso. E pei foi o le folafolaina o faamanuiaga i soo o le Alii (Mat. 13:16-17; Lk. 10:23-34), atoa foi ma le mau e faapea:

"o iinei le sili" (Mat. 12:41-42; Lk. 11:31-32; cf. Mat. 12:6).

O le mautinoa o le i ai o le malo o le Atua iinei o loo faapea ona faailoaina mai i se fetalaiga a le Alii o loo maua i ni foliga eseese i le Mat. 11:12-13 – "Na afua mai i ona po o Ioane le Papatiso, ua oo inei ona po, ua taufoa ai le malo o le lagi, o loo ua avea faamalosi foi e i latou o taufoa. Aua ua vavalo mai le 'au perofeta uma ma le tulafono, ua oo lava ia Ioane." O loo ta'ua foi i le Lk. 16:16 – "O le tulafono ma le 'au perofeta na oo lava ia ia Ioane; Poo talu ai ia ona po ua folafolaina le talalelei o le malo o le Atua, ua taufoa foi e tagata uma." Poo le a lava faauigaga eseese o lea fetalaiga a le Alii, a e foliga mai o loo manino lava lona uiga, o le piriota o le tulafono ma le 'au perofeta ua faamutaina ia Ioane, a e o le piriota o le malo o le Atua ma i latou uma taufoa ina lea ua amataina.

O le isi mau o loo tele pea i ai su'esu'ega a e mafuli lava ina lagolagoina le manatu i le faatauina e Iesu o le "malo o le Atua" o loo iinei, o loo maua i le Lk 17:20-21 – "Ua fesili mai ia te ia le 'au faresaio, 'Pe oo mai afea le malo o le Atua?' ua tali o ia ia te i latou, 'E le oo mai le malo o le Atua ma le vaaia e mata. E le fai ane foi tagata, Faauta, o iinei! Pe faapea, O iila! Aua faauta, ua i ai lava ia te outou le malo o le Atua'". E tele foi su'esu'ega i le faauigaina o lenei fetalaiga a le Alii. Peita'i o le faauigaga sili ona talafeagai e tusa ma le tali atu a Iesu i le 'au faresaio, o le oo mai lea o le malo o le Atua e ala i lona afio mai atoa ma lana galuega tala'i.

E oo lava foi i faata'oto e faatatau i le tuputupu a'e, e ui ina aga'i i le faaatoatoaina o le malo o le Atua i le lumana'i a o loo faapea lava ona

PEPA MAFUTAGA FAAFOUINA

FAIFEAU 2019

faatatau i le oo mai o le malo i le taimi nei. O le galuega faatino a Iesu o loo faatatauina i le luluina o le fatu saito, i le totoina o le fatu o le sinapi, i le tuuina o le mea faafefete i le paluga, ma o le mataupu taua o ia faataoto o le galuega lilo a le silisili ese e oo ai i le faaatoatoaina. Peitai o le malo o le Atua o loo faatatauina i le totoina ma le luluina faapea foi le faafefeteina, o taaviliga ua uma ona amataina, ma ua manino ai lona faatatauina i le faaaliga o le malo i le taimi nei.

O faataoto nei o le tuputupu ae ua faailoa mai ai le ala tonu e mafai ona foia ai le faafitauli o le tau tuufaatasiga poo le faafealofaniga o manatu eseese e lua poo faamamafa eseese e lua ua matauina i a'oa'oga a Iesu e uiga i le malo o le Atua/lagi. E tusa ma su'esu'ega, na faapea ona i ai uma lava ia talitonuga e lua i le mafaufau o le Alii ao feagai ma lana galuega tala'i, ma faapea ona faamamafaina le tasi i isi taimi a o le isi i isi taimi. Peita'i i faataoto o le tuputupu ae, ua faafaigofie ai ona malamalamaina le va-feagai o talitonuga e lua. Ua faapea ona faalia manino i le soifua ma galuega tetele ua faia e Iesu Keriso, le oo mai le malo o le Atua poo le pule-faatupu a le Atua, o se fatu poo se mea faafefete, o le faailoga o le amataina o le taimi o le mesia, peita'i e le oo i lona tulaga e faaatoatoaina ai ona o loo faapea ona tuputupu a'e. O lona uiga, o loo faatalitali pea i le taimi e faaatoatoaina ai i le lumanai. E pei ona molimauiina i le Mareko 9:1, "E moni ou te fai atu ia te outou, o loo tutu mai nisi iinei, e le oo ia te i latou le oti, seia latou vaia le malo o le Atua ona oo mai ma le mana." O lona uiga e matua tele se eseese o le talitonuga o Iesu

Keriso i le faamoemoe o le aso gataaga i le lumanai, ma le talitonuga faa-apokalupisa o tagata Iutaia. Mo Iesu, o mea o aso gataaga e le oo mai ma se faaaliga o le silisili ese mo le iuga o le lalolagi, a e oo mai ma le ola fou e faafouina ai mea uma i le faalia mai o le mana silisili ese o le Atua. O lona afio mai ua sosofa ai e le mana o le "olaga o taimi o le lumanai" le "olaga o le taimi nei" ma faapea ona tumau ai. O lona uiga o lea ua amata le pule-faatupu a le Atua i le lalolagi i lona uiga loloto. I se isi faaupuga, o le malo o le Atua i le vaaiga faa-aso gataaga, lea ua amataina i le taimi nei. O le faagasologa o aso gataaga lea ua amataina, ma o le a faapea ona faataotoina i le lumanai e ala i le faaaliga mai o le mana silisili ese o le Atua.

(i) **O le faaaliga o le tumu atoatoa o le Atua ma lona Malo:** Na iloga ona tautino e le Alii lona le silafia o le aso e faaatoatoaina ai mea uma i le lumanai (Mk. 13:32). Peita'i e mafuli sa'iliga i le manatu na faamoemoe lava le Alii e taunuu i se taimi lata mai a e le o le faaumiumi. E i ai faailoga e iloa ai sa mafaufauina e le Alii se taimi avanoa a o le i uma le lalolagi e tapena ai lana fanau faatuatua. E pei ona ia fautuaina ai ona soo i puapuaga o loo faatali mai mo i latou (Mk. 13:9-13): na ia faailoa mea o le a tutupu e pei o le faaotilaloina o Ieruselema (Lk 9:41-44) atoa ai ma le faatafunaina o le malumalu (Mk. 13:2); o ana a'oa'oga tau i le amio oloo faatatauina lava i le olaga i lenei lalolagi agasala; ua ia faatonuina ona soo ina ia faaauuina le sauniga o le Talisuaga Faaii pe a mavae lona maliu (1 Kor. 11:24-25; cf. Lk. 22:19-20). E foliga mai o le taimi na mafaufauina ua fai lava si puupuu – o se tulaga e mafai ona faamatalaina o se faataitaiga o uiga masani o perofetaga faa-Iutaia e faapuupuuna pe faavavevaveina ai le lumana'i.

(o) **O le Malo o le Atua ma le Satauro:** E leai se fetalaiga ale Alii e faatatau i le fesoota'iga o le oo mai o le malo o le Atua ma lona maliu i le satauro. Peita'i e i ai lava le manatu na silasila lava le Alii i lona maliu ma lona toetu o le taunuuga o lana galuega faa-mesia (Mk 8:31; 9:12, 31; 10:33-34. 45; LK. 12:49-50; 13:32-33; 17:25). Ua manino mai ai le tatau lava ona i ai se fesootaiga o le Satauro ma le talitonuga i le malo. E le tatau lava ona tuueseeseina le satauro mai le galuega tala'i a le Alii; ma o le avea ai o le satauro e fai ma taunuuga o le galuega faa-mesia, o lona uiga o le Satauro o le vaega taua o le faaaliga o le mana silisili ese o le Atua ua amataina ai le gasologa o aso amuli poo le gataaga.

(u) **O tagata (nuu) o le Malo:** O le pule-faatupu poo le nofoa'iga mamalu a le Atua, lea ua faauigaina ai le malo o le Atua, e le o se malo e faatautaia i se gaogao. O lona uiga e tatau ona i ai se li'o o tagata poo se nuu e faatinoina ai lea pule-faatupu a le Atua. O lea mafaufauga o loo atagia i le tele o a'oa'oga a le Alii e uiga i le malo. O mau e uiga i le laoi i le talisuaga a le Mesia/Alia o loo faatatauina i se li'o o tagata; e faapea foi ma isi faataoto o loo atagia ai le o mai faatasi o ni tagata e talia ma fiafia ai (Mat. 13:24-30, 31-32, 36-43, 47-50). I ia fetalaiga ma faata'oto, e foliga o loo faatatauina i se nuu i le lumana'i, o le faaatoatoaina lava lea o le malo. Peita'i e mafai foi ona faamatalaina e faatatau i le nuu o tagata ua talia le pule-faatupu a le Atua i le taimi nei, ma ua faapea ona tuputupu a'e mo le faaatoatoaina o le malo i le lumana'i.

O loo faamamafaina e le Alii i nisi o ana fetalaiga le ulufale o tagata i le malo o le Atua (Mat. 5:20; 7:21; 18:3; 21:31; 23:13; Mk. 9:47; 10:15, 23-25). I le tele o ia mau o loo

PEPA MAFUTAGA FAAFOUINA

FAIFEAU 2019

faaogaina le taimi lumana'i e foliga ai o loo faatatau i le faaatoatoaina o le malo i le lumanai. Peita'i o le ala e ulufale ai ma tulaga e tataua ona faatinoina, o loo faia uma i le taimi nei o ni faata'ita'iga o lea tulaga o le usita'i i le finagalo o le Atua (Mat. 7:21), o le faaalua o le amiotonu e sili atu nai lo tusiupu ma faesaio (Mat. 5L20) ma isi.

I lea talitonuga i le li'o o tagata poo se nuu o e ua talia le pule-faatupu a le Atua o loo faaalua lava i le galuega a le Alii, ua mafua ai ona i ai le faafesootaiga i le va o le malo o le Atua ma le Ekalesia. Ua vaaia ai le Ekalesia e le o le malo o le Atua, peitai o le li'o o tagata poo le nuu ua talia le malo, o tagata lava e mafai ona i totonu o le Ekalesia.

(f) O le olaga e tataua i le malo o le Atua: o le malo o le Atua o le meaalofa o le alofa tunoa o le Atua ua ofofuaina mai mo i latou uma e fiafia e talia. Peita'i o le taliaina o le malo, o le ofoina lava lea o le ola i ala tataua e mana'omia ai le atoatoa ma le tafatasi o le loto ma le agaga. O lona uiga, o le malo o le Atua e pito i sili ona taua mo le tagata e mafua ai ona saili ina ia maua, nai lo se isi lava mea (Mat. 6:33; LK. 12:31). O faataoto e lua i le 'oa sa natia ma le penina tautele o loo i le Mat. 13:44-46. Ua faamamafaina ai le tataua i le tagata ona aveeseina uma mea ua faatauaaina i lona ola, ina ia maua le malo o le Atua. Faapena foi le a'oa'oga i le Mk. 9:43-47, i le faatauaaina o le malo o le Atua e sili atu i lo le ola lava ia. O le mea ua mautinoa, o le olaga tataua ma le malo o le Atua e ao ona ola ai le tagata ua fia maua le malo, a o lea olaga e amata i le faatuatua e taliaina ai le pule-faatupu a le Atua i le ola. O le fasiotia lava lea o tuinauga uma o le ola, a e faaulufale le Alii o le ola e fai ma tupu i le loto ua faafouina ia te ia. O le faavae o lea ola ua faalia i le tulafono faa-auro. Ia alofa i le Atua ma alofa i le tuaoi (Mk. 12:28-31; Lk. 10:25-37). O le alofa le faatuaoia o le Atua ua ola ai le tagata, ua faapea ona atagia ai le

pule-faatupu a le Atua i lona ola i aso uma ma taimi uma. E le na o le faailoa o le tulafono e ao ona ola ai, a o le olaina i le atoatoa e tataua ai, e oo lava i le afaina ai o lona lava ola.

4. O le Malo o le Atua i isi tusi o le Feagaiga Fou:

Ose tulaga ofoofogia le utiuti o faamatala e uiga i le malo o le Atua i isi tusi o le Feagaiga Fou, a o se mata'upu ogatotonu i a'oa'oga a le Alii a o soifua ma galue o ia e pei ona taua i luga. Peita'i o le mata'upu tau'ave i a'oa'oga a le ulua'i Ekalesia i taimi o le 'au aposetolo, ua le o le malo o le Atua, ao le Kerisiano lava ia. I le sailiga i a'oa'oga a le Alii na aliali ai le loloto o le feso'otaiga o le mataupu i le malo o le Atua ma le soifua o le Alii ma lana galuega. O le talitonuga, ua le faaaluina le taimi o le 'au aposetolo e toe faaluaina a'oa'oga a le Alii e uiga i le malo, a ua tuuina la latou faamamafa i le taua ma le uiga loloto o le afio mai o Iesu, o le Mesia na maliu a ua toetu (cf. 1 Kor. 1:23; 2:2; 15:3-4), o ia foi o le a toe vave ona afio mai i lona mamalu (cf. 1 Tesa. 1:10; 2 Tesa. 1:7). O le talaiina o mea na tutupu i le soifua, maliu ma le toetu o le Alii, ua o gatasi ma le faalauiloina o le i ai o le malo o le Atua faatasi ma tagata, atoa ai ma le faamoemoe o le toe afio mai o le Alii e faaalua atoatoa le malo o le Atua e tusa ma ona lava taimi i le lumana'i.

O loo faalia foi i le tusi o Galuega, o tusi a Paulo, o tusi a Ioane, atoa foi ma Eperu, Iakopo ma Peteru faamatalaga e ui ina le tele e faatatau i le malo o le Atua. Ma o loo faapea ona faamamafaina ai lava foi uiga o le malo e pei ona talanoaina i luga, e le gata ua faapea ona i ai le malo faatasi ma tagata, a o loo faapea foi ona faatali ma le faamoemoe i le toe afio mai o le alii, na te faaalua manino le tumu atoatoa o le malo o le Atua ua oo mai ma le mana tele o le silisili ese.

Upu Faaiu

Ua umi lenei pepa, a ua taumafai lava ina ia oo oo lava i se tulaga e tuu malie

ai le talanoaga i lenei mataupu taua ma ogatotonu i la tatou galuega tala'i ma a'oa'oga atu. O le mafuaaga lea o le tauasaina o le Feagaiga Tuai ma isi tusitusiga taua i luma atu o le afio mai o Iesu Keriso, ina ia maua ai se atoaga o lea talitonuga i le malo ma lona uiga. Ua vavala mai ai se taunuuga e mafai ona avea ma ala e limataitaina ai le laugaina, a'oa'oina ma le talanoaina o le mataupu i le Malo o le Atua i avanoa uma e mafai ona maua.

O le malo o le Atua, o le pule faatupu poo le nofoa'iga mamalu a le Atua i le soifua o tagata uma aua faapea ona talia fiafia le Alii ma lona malo i le faatuatua ma le ola ua tafatasi i le Atua. Peita'i o leoleoga i lea malo o loo ua feagai pea ma faigata ma puapaga e tele atoa ma le taua faifaipea ma le tiapolo ma lona foi malo, ma o le mafuaaga lea e faatalitali ai pea ma le onosai le fanau a le Atua ua pule-faatupu ai le Atua, seia faaalua le tumu atoatoa o le malo o le Atua e oo mai ma le silisili ese o le mana faaola o le Atua e tineia ai le tiapolo ma ana 'au, ae faatumauiina lona malo faavavau, e faavavau lava.

O nei mea uma o loo tutupu poo le a lava le ogaoga o le aafia ai o le soifua o le fanau faatuatua a le Atua, o e ua talia le pule-faatupu a le Atua ma soifua ai, ua soifua ma le mautinoa le manumalo faatasi ma le Atua i le taimi e faaatoatoaina ai lona malo e faavavau, i ona lava taimi e finagalo ai o ia.

Tusi Faaogaina:

1. Buttrick, George Arthur, et. Al, The Interpreter's Dictionary of the Bible, Abingdon Press, Nashville, 1981.
2. Douglas, J. D, et, The New Bible Dictionary, Intervarsity Press, Nottingham, 1962.
3. Miller-Fahrenholz, Geiko, The Kingdom and the Power: The Theology of Moltmann, SCM Press, London, 2000.

Manuia le Mafutaga o le 2019 Saunia: Taipisia Leilua FFA

“FETU’U TU’UNA’I MUNIAO”

Mareko 14 :50 *“Ona tu’ua ai lea o Ia e i latou uma ua sosola.”*

O le sola a Lotu o le fa’atonuga mai le Atua, e o ese mai le nu’u ua malaia. O le sola a Iona e le o se fefe, ae o le ita ma le manatu fa’apito. O le sola a Elia, o le sola a le auauna ua malui’a lona fa’atuatua, i le fa’amata’u a le fafine leaga, o Iesepela. A’o le sosola a le Au so’o ae tiai to’atasi le Ali’i, o le sola a le kerisiano ua taomia e le pala’ai lona fa’amaoni. O le sola a le tagata ua leai se fa’amoemoe.

Ma oute le sese pe a ou faiatu, o se fuaiupu pito i fa’anoanoa lea i le Tusi Paia atoa. Le taimi na aupitosili ai ona manaomia e le Ali’i le mafanafana o le Alofa fa’auso. Ua a nei? Oka se tala ina a, fa’anoanoa. *“Ona tu’ua ai lea o Ia, e i latou uma ua sosola.”* O le upu a le poto... *“O le uo mo aso uma, ae fanau le uso mo aso vale.”* Ua sosola uo, ae ua leai foi se uso, Talofa e, i le Ali’i, ma’uma’u pe ana ou iai i le taimi lea, tailo...

O le mea pito matautia lea, na amata mai lava ia Peteru le ta’ita’i... Ioane le so’o alofagia... Iakopo lona uso lea na mana’o e nofo ile itu taumatau o le Ali’i. Ta’atia ia le lalolagi ma le motu o tagata. A’o le au so’o na falemoa, ‘ma a’ ai fa’atasi, mafuta fa’atasi

lea ua sosola ae tiai. Afai la na sosola le au so’o, o lona uiga, ua matua leai lava se tasi i tafatafa o le Ali’i i taimi o ona puapuaga.

Ae faimai le tala na mulimuli mamao atu iai Peteru, ae na iu ina fa’afiti i le Ali’i. Lea foi e taua e Mareko le isi taule’ale’a na puea foi, ae na sola le lavalava, o ia lea o Mareko. O le ata lea o le po na puea ai le Ali’i ma ta’ita’i atu i lona fa’amasinoga... O se po faiaina ma toilalo mo e na mulimuli i le Ali’i. Ma o le upu o lo’o fa’amatala uma ai tagata na mulimuli i le Ali’i aemaise le au so’o.. ‘ O le sosola , ae tiai.’ Aisea? Ia, o ai se a le fefe pea vaai atu, i le iuga ua o’o mai. O le kali a, o le pefu...

Peita’i, o le mea ua mautinoa, e lei miga pe na faitio le Ali’i, ina ua leai se tasi la te to’alua, e tauave fa’atasi ona’ tiga i lea po. Leai, na alu to’atasi lava ma le onosa’i na alu ma lona loto fiafia, o lona ola lava ia fa’ataumao’i, ia manu’anua’ ma fa’atigaina, ina ia tau lau o le fa’amoemoe Paia o lona Tama, o lona ola ia fano, a’o le tagata agasala ia magalo ma fa’aolaina.

O le fesili ua tulai mai... “Ana tatou iai i le po lea, o featonu lava tatou te tutu ai.? O le itu a Iuta le fa’alata, po’o le itu a le au sosola, po’o le motu o tagata? Ia e fai ae le tagata ia lana tali, leaga e fua i

lou olaga lena e fai, ma au galuega o lo’o fai, po’o e fa’amaoni po’o le tau ina fai, po’o le mapoupu, ae fuamoa le fa’atinoga... O le upumoni, o tatou isi ole au sosola fa’atasi ma le au so’o, fa’atasi ma Iuta le fa’alata i le po lea. O nisi foi la e tutu mai i le motu o tagata, ma fanafana mai i le Ali’i. O le mea foi ua iloa i le po lea, e le na’o Iuta le tagata fa’alata, o i latou uma na sosola ae tiai toatasi le Ali’i, ua latou fa’alataina lava le Ali’i.

O le upu moni, e iai taimi e taomia ai e le fefe ma le palaa’i lo tatou ola fa’atuatua i le Ali’i. O nisi taimi ua fa’avaivai ma fa’afiti ua le fia iai. Manatua, o le ‘anava lea a le fili, e taumafai e fa’aleaga o tatou loto, ma fa’amasalosalo lo tatou fa’atuatua i le Ali’i. Peita’i, ole tala ia Iopu, ma ona puapuaga, ma mea tiga na o’o ia te ia, e le faigofie. E feololo lona tamaoiaiga, ma ana meatotino na aveeseina, ae o le ave’eseina fa’afuase’i o lana fanau, i le taimi e tasi, oka ose tiga lava ina a ogaoga, e le mafai ona tauave ese malosi fa’ale tagata. Ae faimai le tala ina ua uma ona ta’u atu mea ia, ia Iopu, ae fai mai lana tali... *“Na foaina mai e le Ali’i, ua ave’eseina e le Ali’i, ia fa’amanuina le suafa o le Ali’i...”* Oka, se fa’atuatua ina a malosi ma loloto.

O le fesili, O a mai lou fa’atuatua, ma lou ola talitonu i le Atua?

Tusia:

Keneti Leaupepetele (FS)

**EFKS Savaia & Tafagamanu-
uta**

ITULAU MO TUPULAGA TALAVOU

FETU'UTU'UNAI MUNIAO.

Tala mo Ulugali'i Talavou.

Talu lava ona fa'aipoipo ma amata se tasi aiga, ose aiga le paleni. O le tinā ose tagata ua matua lelei lona a'oa'oina, ma na fa'avae mai lona olaga e ni matua kerisiano, ma ose tina e matua galue malosi e atia'e lo la aiga, aemaise le tausiga o si a la fanau, e lei se mea e fa'aletonu. Peitai, o le tamaloa ose tagata inu ava ma le saua, e le fautuaina, e fa'amauualuga ma e le alofa ise tagata, ele fiafia foi ise lotu. Po'o lea le tele o mea lelei e fai e le tinā, mo le lelei o la aiga, e le taitai ona fa'amalieina ai lona loto ma e na te le amanaiaina. E faimai lava ia o le fafine e leaga. Ae mafua ona fa'apea, ona o le tamaloa e tele lona tamaoiga, tele tupe, toe lelei le galuega.

O le mea na tupu, na o'ina tuliese e le tamaloa le fafine lenei ma lana fanau ua le toe manao ai. Ua mavae ni nai vaiaso, ona fai lea e le tamaloa se fa'asalalauga i le TV, mo se tamaitai faigaluega na te faia mea ia sa fai e lona toalua. Toatele tamaitai na tusi talosaga mai ma na iloa e le fafine le fa'asalalauga lenei, ona ia talosaga mai foi lea iai. Peita'i ona o aiaiga ma tu'utu'uga o le fa'atinoga o le galuega lea na fua iai lea fa'aiuga a le tamaloa i le tina na ia filifililia. Ua fai feso'otaiga ma ua fai le tonu i le mea e feiloai ai ma le taimi e fai ai le fa'atalanoaga mo le galuega.

O le upu moni, na matua fa'amalieina le tamaloa i tali ale tina lea, le ituaiga mea'ai e fiafia 'ai ai, le tapenaina ole fale e fiafia ai, o ituaiga ofu ma seevae e fiafia ai, ma le mea e fai pe a tali ni malo... Na matua tautino a le tamaloa, lea fa'atoa ia maua lea ose tagata e malie ai lona loto i le fa'atinoga o mea e mana'o ai, ma ole tinā lea ua fetau lelei ma le galuega.

O le mea o lo'o tupu e le o iloa ele tamaloa, o le tinā lea ua ia maua le galuega, ma e fetau lelei ma mea e manao ai lona loto, o lona toalua lea na ia tuliese mai lo la aiga. Ua ia le iloa aua ua sui le style a le fafine, ma ua oti pu'upu'u lona ulu. E lei atoa le tausaga ae amata ona nanau le loto ole tamaloa i lana teufale fou lea, ua fia fa'aipoipo iai. Ma na ui lava ina tapena le fa'aipoipoga. O le mea malie i nauau ma le fa'aipoipoga, taimi o le la honey moon, na fa'atoa ta'u ai loa ele tina lenei i le tamaloa le mea lea e tupu. E lei talitonu le tamaloa, ona ia fesili lea pe aisea na ia faia ai lenei mea.

O le tali lenei a le tinā lea. "Talu ona ta fa'aipoipo ma fai lo ta aiga ma ta maua le meaalofo o le oloataua a le Atua. Na ou iloa ose aiga, fa'amanuiaina lo ta aiga, aua e lelei lau galuega ma maua tupe. O le ala foi lea o lou matua galue ma le fa'amaoni, e atia'e lo ta aiga aemaise sia ta fanau ia manuia le lumanai. Peitai, ona o oe ose tama e le fautuaina, e te lei amanaiaina lau tu'ualalo na fai atu, ae fai lava le mea na e loto iai, aemaise

fautuaga a au uo. Na ou iloa foi e te lei fa'amaoni i le ta mafutaga. Lea na iu lava ina e agaleaga ia te au ma si au fanau, ma matou o ese ai ma lo tatou aiga. Na iai lava lou manatu oute le toe fia foi mai, aemaise foi upu a tagata na fai mai ia te a'u, peitai, e lei malo ia mea vaivai, o le mea na sili ia te a'u, o le ta tautoga ua uma na fai i luma o le Atua, aemaise sia ta fanau, e fesili pea, po'o fea Daddy."

Na matua fa'ateia le tamaloa i le tala a lona toalua, ma o le taimi a lea na to'otuli ifo ai le tamaloa ma fa'atoese i lona toalua, ma fai mai ana upu... "Mum I'm sorry". Oka se manaia o lenei feau, ua aumai e lenei tinā, mo tatou uma aemaise lava le itupa o tinā. Manatua o le tou fa'alupega masani... "o pae ma ma 'auli' O lona uiga o outou, e fa'alauleleia, ma fa'amafolafola ni to'atuga i mafutaga. Leaga o la tou tu'ualalo (fautua), o le fatu lea e fealofani ai 'aiga, e maopoopo ai faiga nu'u, e manuia ai le Galuega a le Atua. Manatua le tala ia Apikaila ma le mea na ia faia, lea na fa'aolaina ai lona aiga, mai le lima o Tavita. Na ona ia iloa lava o le mea na tupu, i le agaleaga o lona to'alua o Napalu, i le 'asamoga a Tavita ma ana auauna, e lei toe fa'atali, ae na galue loa fai le mea e tataua ona fai. Le tinā mataala ma atamai le fa'autaga, leaga e ola matau i le Atua. O le iuga, na fano Napalu le tagata leaga, ae na fa'aeaina o ia e fai ma masiofo Tavita le tupu o le Malo.

**Keneti Leaupetele. T. (F.S.)
EFKS Savaia & Tafagamanu-
uta**



A Page for Youth

ITULAU MO TUPULAGA TALAVOU

IA E TOE FOI I LE ATUA.

Teuteronome 30:2
Ieremia 31:25

E iai se taimi na e faia ai se amio sesē i lou manatu e lelei ma e alu ese mai ai i le Alii? Ni amio le lelei, faaalua ai lou fia malos, le kea le mafaufau, le faaalua, faamaualuga, le popoi ma isi. Afai sa e fiafia iai, na o se taimi, ae mulimuli mai lou masiasi, faalumaina, ta'uvalea ma le matagā. E le'i iai i lou mafaufau i se taimi ua e faamafatiaina, ma faatigā i le finagalo o le Atua ona o o'e o lona faatusa ma lana mea totino na faia e ia mo ia e faaao iai mea uma o lana foafoaga. Pe ete le'i tu'i tino ea i se taimi ona o lou faavalevaleyalea i amio sa faia e leai ma se lelei ia te oe ma ou matua, lou aiga ma sau fanau

fo'i i se taimi. Ioe e iai ina ua e toe atamai ma iloa le mea e tatau ma lelei ona fai. Peita'ie le silasila le Atua i lo tatou faavalevaleyalea, ae vaai o ia iai tatou o tagata taumafai ma a'oa'o ina ia iloa le uiga o lo tatou ola. E ui lava ina tatou sese tele o taimi ae le silasila le Atua o tatou tagata toilalo ma le leaga, ae tulimatai i lana silafaga alofa le taimi e iloa ai e le tagata le mea moni ma le lelei. Le taimi e toe fuataina ai le mafaufau ma le ola i le tagata so'onafai. Ua salamo le loto, masiasi ma ua iloa le matagā. A ia manatua pea o le Atua o le Atua faamagalalo i le tagata ua matua salamo i mea sese ma le leaga na ola ai, ma toe foi i

le Atua ma le loto ua faamaualalo ma talitonu ia Iesu ma le loto faamaoni.

Tuu le amio le mafaufau le faamaualuga, le fiasili, fiatagata manatu faatauvaa i isi ma le tele o uiga le lelei, ae foi i le satauro e manuia a ma to'amalie ai le loto. Le Alii e, ua matua ou lagona le masiasi i mea sesē sa ou faia i taimi ua mavae. E iai amio le pulea lelei ma le mataga ua ou lagonaina ai le faanoanoa. Ae faafetai tele ua e le silasila mai o au o le tagata leaga, ma le toilalo, ae ua e faamagalalo ma talia au o le tagata agasala fia ola.

Fesoasoani mai lou agaga ina ia ou faagalalo mea sesē na ou fai ae ou savali i le lumanai i le ala e te finagalo ou te savali ai. Foi i le Atua ma le loto faamaualalo, faamaoni ma le faafetai.

Manuia le aso.

Tusia:

Solomona Tuatagaloa (FT)
(Faifeau Toeaina Penisione)



SULU I LE ATUA I TAIMI FAIGATA MA PUAPUAGA.

Isaia 25:4
Nauma 1:7

E lelei le Alii i taimi uma, peita'ie a oo mai taimi o faigata ou te le iloa se mea a fai e aunoa ma ia. E iai se taimi poo ni taimi ua e le iloa se mea e fai ia ua e feagai ma fa'afitauli poo faigata e mafatia ai le mafaufau.

O le fefe, popole ma le atuatuvaletale pogisa le vaai i se mea lelei tatau ona fai ma iu ai ina fai le faaiuga sesē e uma ai le ola.

Ia e mautinoa e silafia e le Atua mea ia te oe, ma i latou e talitonu ma faatuatua ia te ia. O mea lelei ma mea faigata. Na te le tu'ulafoaiina oe. Ou te tau atu ma faamalosi ia te oe tatala lou loto ma lou mafaufau i le Alii faaulufale lona agaga e ta'ita'i ma faamalosi ma faatonutonu ia te oe le mea e ao ina fai.

I taimi lelei ma faigata, Le Alii e, o oe o lou malu ma lou paolo.

Faafetai ua e iloa a'u ma e agalelei ma alofa mai pea i taimi uma, ou te sulufai atu ia te oe ma lou mautinoa e te fesoasoani mai ia te a'u. Ou te faatuatua ma talitonu i lou alofa ma le agalelei i le tagata fia mapu i faigata ma puapuaga o le olaga.

Manuia le aso.

Tusia:

Solomona Tuatagaloa (FT)
Faifeau Toeaina Penisione



O LE TAUA O LOTU I AIGA E FAAMASANI AI LE FANAU.

O le ulugalii ma le fanau e toalua o le tane e le lotu lava ia, a e le faalavalave foi i lotu.

E o na' o le fafine male fanau i lotu ae le lotu lava le tane. Ua tupu ae le fesili i le mafaufau o le fafine. Po ua lava le o na' o ia ma le fanau i le lotu ae aua nei toe faia ni lotu i totonu o le aiga? E fia maua la, e le fafine ni tali mai le au Kerisiano. Ao lau lenei fesoasoani e faaopoopo i sou manatu. E ao ina iloa e lenei fafine le uiga moni o le o atu i luma o le fanau. Ia iloa ona ola faaalalo le fanau ia Iesu Keriso ma ia ola mo Keriso i totonu o le aiga. O le tele o agasala i aiga nuu ma malo e mafua mai i le faatamala o aiga e leai ni fatafaitaulaga ua fauina i totonu o se potu o le latou fale, e faapitoa mo Tapuaiga i le Atua. Ua leai foi se Amio lelei e pei o se soo.

I aiga o i ai se fanau e toalua pe toatolu pe sili atu foi o ni Kerisiano, e tataua ona fai le faafetai i mea taumafa uma, ma ia faia i le fata faitaulaga o i ai i le fale o le aiga. E lelei e pepese faatasi ai le fafine ma le fanau, e faitau faatasi ai le Tusi Paia e le tinā ma le fanau, e tatalo faatasi ai le fafine ma le fanau, e mafuta faatasi ai le fafine male fanau ma Iesu Keriso.

A mafai ona faatasi ane le tane i se latou lotu e lelei lona, e fai ma ala e na te talia lemu ai Keriso. Ae afai e le faatasi ane i ai ia alofa le tinā, ia sii i luga i le Atua i la outou tatalo le igoa o le tane.

O se aiga e i ai so latou fata faitaulaga, i totonu o lo latou fale e aveva lona ma ta'ita'i mo le fanau ina ia faa Kerisianoina ai i latou ma ola ai, e fiafia e tapuai i le pepese faatasi, e viia ai le Atua i lona viiga

fai faatasi, e pei ona faia pea e le fafine ma le fanau.

O lotu i aiga e mafua ai, ma tupu mai ai le sosoo faatasi ma le mafuta faatasi o se aiga e fai se ifoga i le Atua, a ia faia lava i le Fata faitaulaga ua fauina i lo latou fale. O lea foi Tapuaiga fai faatasi o le a le mafai ai e Satani lona fia maua o le fanau a o laiti i latou, ae ua mafai ai ona teena le fili, na te le toe mafaia foi ona liliu le fanau. Ua masani ona vivii faatasi i le Atua ma ua ola i totonu ia Keriso lo latou Faaola.

Tinā e o aiga, fau ia ni fata faitaulaga i totonu o outou fale mo le fia ta'ita'iina o le fanau e faamasani ona mafuta i lo latou Faaola. Tuu pea ia le tane, e le lotu ae ia e alofa momoli lona igoa i le Atua i lau tatalo ina ia lua mauaina faatasi le manuia ma la oulua fanau i se aso o muamua o lo outou olaga. Tinā e, e tele polokiki a le tane e fai atu ia te oe ina ua le alu i le lotu, e pei o nisi ia filosefia a le tane i lalo.

Ou te le alu i le lotu, e taugata tele tinā e, fai atu ia i le tane. E le totogiina le lotu. Ae taugata tele le ava malosi. O le isi sio a le tane. Ou te le lotu ua vevela le Aso Sa ae vevela le fatai umi o vae i le pele tupe. E vevela foi le faigaluega mo le mana'o i tupe i le Aso Sa.

Tinā faaali atu i le tane, o le tui e sili ona tui ai le tagata i puapuaga o le tupe. Ao ai ua le mana'o i se tupe?

Ae le ole tuinanau i ai ae faaeteete o le tui leaga e tui ai loto ma mana'o o tagata popoto tele i mataupu o le va teatea ma le poto o le lalolagi. E pei ona tautala se tasi Samoa

poto i se nuu lotu ua mamao, e fai ia ma o latou faifeau. A le lava lou alofa e tusa ma lou poto, e taugata tele, e le talia e au lo outou mana'o o e sue se isi faifeau. A le sii lou totogi ua ou musu. Ia tusa lou totogi ma lou a'oa'oina. Ua galo o le poto o le mea a le Atua na maua e nisi tagata i le ala o le amiotonu ina ua lelei faavae mai le olaga o le fanau e tinā lava. O le faiaoga muamua o le fanau i le Tala lelei. O le faiaoga foi o le fanau, i aso uma, e mafuta ai ma le fanau i le aiga.

Tusia:

**Vaalotu Nafai Taulapapa FS
Faifeau Penisione.**



Quote:

John 14:6

Jesus answered, "I am the way and the truth and the life. No one comes to the Father except through me"